



GOBIERNU DEL PRINCIPÁU D'ASTURIES

CONSEYERÍA D'EDUCACIÓN Y CULTURA

Dirección Xeneral de Planificación Llingüística y Normalización

Día Internacional de la Llingua Materna

Vienres, 19 de febreru del 2016

Por cuenta de la celebración del Día Internacional de la Llingua Materna, dende la Conseyería d'Educación y Cultura anímase a toles Comunidaes Educatives del Principáu d'Asturies a participar na llectura y reflexón del manifiestu que s'acompaña.

El cuidáu y la responsabilidá de caltener una llingua materna como la nuestra ye un llabor de toos/es y un apueste de futuru.

Fernando Padilla Palicio
Director xeneral de Planificación Llingüística y Normalización

DÍA INTERNACIONAL DE LA LINGUA MATERNA

La Conferencia Xeneral de la UNESCO proclamó en payares de 1999 que'l 21 de febreru de cada añu diba celebrase'l **Día Internacional de la Llingua Materna**. Y asina, dende l'añu 2000, acútase esta fecha pensada pa promover el multilingüismu y la diversidá cultural.

Nesti añu 2016, y acordies colos oxetivos establecíos na Axenda de Desenvolvimientu Sostenible pal 2030, la UNESCO escueye un lema nuevu pal Día de la Llingua Materna: **Educación de calidá, llingua (lilingües) d'enseñanza y resultaos d'aprendizaxe**.

La intención que tien la UNESCO ye dexar bien a les clares la importancia de tolos idiomas, y n'especial les llingües maternes, p'algamar una educación de calidá.

L'usu de les llingües minoritaries, asegura l'organismu internacional, aumenta la calidá de la educación, meyorando les capacidaes de comprensión y creatividá; y favorez, nes interacciones del aula, un arriquecimientu de les rellaciones sociales y de les estratexes comunicatives.

Y asina, el dominiu y l'usu de toles llingües, tamién de la llingua asturiana, ameyora la competencia nesti ámbitu y en tolos aspectos onde'l llinguaxe ye una ferramienta necesaria pa entender, compartir, rellacionase y aprender.

N'Asturies tenemos una llingüa materna, l'asturianu, que podemos aprender na escuela, nel institutu o en casa. Que podemos escuchala na música o lleela nos cuentos y nos llibros.

Falar l'asturianu ye, en definitiva, abrir una puerta al conocimientu de lo nuestro, ye abrir una ventana a otres llingües romániques y ye abrir los güeyos a un mundu enllenu de posibilidaes.